## 111年全國語文競賽客家語朗讀文章國中學生組(海陸腔)

## 編號1號

## 【承水】林伯殷原作

落水咧!落水咧!看著大水點珍等風對偃掃過來,心肝肚正在該想,這陣水望還久哪!望到圳溝燥忒、河壩燥忒、水庫乜燥忒咧!望到連田泥就必開來咧!偃正想愛摎手伸出屋簷下摸一下久見个雨水,言知無兩下,屋簷水就瀉往出,打在地泥下滴滴溚溚',大嫲牯聲提醒偃,講這水毋會細哦,仰做得打爽忒!偃黏時去尋水桶放在屋簷下承水,想……等水張淰个時節,好倒落水庫貯起來,看做得毋使再過限水無?

看等、看等,水桶承个水緊來緊急,個个心肝頭就越來越歡喜,感覺落大水還好哪!早恁久咧,滿哪都燥絲絲,有大水來解決欠水,還有麼个比這較好个?個个心肝變到盡貪,想……一陣大水仰會罅,係水無落較久兜、落較多兜,摎水庫撐到飽飽,若係太陽公三、兩下又弄等出來²,該就無結煞咧!又毋知愛望水望到幾時?好得屋簷水還係直直瀉,水桶還係當當承,一桶、兩桶、三桶……,水桶承个水涂了又涂,個斯像人看著水庫个水溢

出來3樣,實在還歡喜哪!

過一站,水變細咧,屋簷水變成一點一點慢慢跌到水桶肚, 偃聽著涿、涿、涿个聲音,忽然間想起老屋个承水聲,該屋外落 大水,屋肚落細水个時節,地泥下排等个盆頭缽仔,分屋頂跌下 來个水點打出滴滴涿涿<sup>4</sup>个聲音,還會隨等落大水變遽、落細水變 慢,暗晡頭係睡在眠床頂,用聽就知外背个水落有幾大。係堵著 風搓,水掃掃滾<sup>5</sup>,又聽著屋肚滴滴涿涿个承水聲,該就愛大愁屋 頂毋知會承毋贏風雨,嗄塌下來無!平平係承水,仰在屋簷下摎 屋肚會有恁大个爭差呢?好得這下人大體戴樓屋,毋使再過看著 落大水就愁屋肚愛承水無!

天公還惜偲俚哪!連連續續又落好久个水,各地水庫个水位 升加已多,照理講,大家較毋使驚無水好用咧,毋過,偃還係知 有落水,就會尋桶放在屋簷下承水,想留加兜水來用,聽等該滴 滴涿涿个聲音,偃个心肝肚無半點愁慮,嗄有一種當滿足个感 覺。

<sup>&</sup>lt;sup>1</sup> 滴滴溚溚: 音 did` did` dab`;形容雨滴打在地面或物體上所發出的聲音。

<sup>&</sup>lt;sup>2</sup> 弄等出來:音 nung nen chud loi;鑽著出來。

<sup>&</sup>lt;sup>3</sup> 湓出來:音 pun chud loi;滿出來。

<sup>&</sup>lt;sup>4</sup> 滴滴涿涿: 音 did` did` dug` dug`; 形容水滴滴在地面或物體上所發出的聲音。

<sup>&</sup>lt;sup>5</sup> 掃掃滾:音so<sup>\*</sup>so<sup>\*</sup> gun<sup>'</sup>;用槍枝連續掃射的樣子。